

- 1' Der vocht zwen hasen vff eyn mol
- 2' Wer meynt zweyn herren dienen wol
- 3' Vnd richten vß me dann er sol



### vom dienst zweyer herren

- 1 Der ist eyn narr der vnderstot
- 2 Der welt zů dienen / vnd ouch gott
- 3 Dann wo zwen herren hat eyn knecht
- 4 Der mag jn nyemer dienen recht

5 Gar oft verdürbt eyn hantwercks man  
 6 Der vil gewärb vnd hantwerck kan  
 7 Wer jagen will / vnd vff eyn stund  
 8 Zwen hasen vohen / mit eym hund  
 9 Dem wurd ettwan kum eyner wol  
 10 Gar dick würt jm gantz nüt zū mol  
 11 Wer schiessen vß vil armbrust will  
 12 Der trifft kum ettwan wol das zil  
 13 Wer vff sich selbst vil ämpter nymbt  
 14 Der mag nit tūn was yedem zymbt  
 15 Der hie muß syn vnd anderswo  
 16 Der ist recht weder hie noch do  
 17 Wer tūn will das eym yeden gfalt  
 18 Der muß han ottem warm vnd kalt  
 19 Vnd schlucken vil das jm nit schmeckt  
 20 Vnd strecken sich noch der gedeckt  
 21 Vnd können pfulwen vnderstrowen  
 22 Eym *yeden* vndern ellenbogen  
 23 Vnd schmyeren yedem wol syn styrn  
 24 Vnd lügen das er keynen erzürn  
 25 Aber vil ämpter schmecken wol  
 26 Man wermbt sich bald by grossem kol  
 27 Vnd wer vil wyn versūchen dūt  
 28 Den dunckt doch nit eyn yeder gūt  
 29 Dann schlächt geschmydt / ist bald bereit  
 30 Dem wysen liebt eynfaltikeyt  
 31 Wer eynem dient / vnd dūt jm recht  
 32 Den halt man für eyn trüwen knecht  
 33 Der esel starb / vnd wart nye satt  
 34 Der all tag nüwe herren hatt

d1'

d

---

14 was GW5046 ] das GW5041 GW5047 22 yeden ] yedem GW5041 GW5046